

Teleu Basoak

~1~

Belo o adé rajo kayo. Bapak ne o kayo nien. Anak ne adé teleu. Teleu basoak o man̄jo nien. Wakteu si bik lei, jane kelak anak ne o, kete ne tenurut bapak ne. Sapeé lei gik tetep man̄jo. Udém o bapak ne mateé, tingā ba iñok ne igei. Coa an udém o mateé kulo iñok ne. Tobo o lebéak kayo nien. Harto deu. Kerno biaso man̄jo, tobo o coa lak bekerjo. Jane baé adé nak penan ne. Misal ne umei ne libe, tapi taci ne didik. Tobo o jemuoa umei. Udém jemuoa umei, taci bejuoa gacang abis. Tobo o jumuo kulo isi alat umeak-umeak ne di leyen ne. Umeak ne o deu. Udém o coa adé igei penan ne. Umeak ne déwék si jemuoa kulo. Hak tobo o abis.

Teleu basoak yo ano beé kete. Asoak ne dik paling titik o tun ne penyedi. Si galak tema'ak uleak ngensanak ne. Ngensanak ne coa lak temotoa kécék ne. Tobo yo bi cigei adé igei hak ne. Si jizei saro, aleu mai lem im̄o. Wakteu si saro nak lem im̄o, jane dik nem̄in ne adé ba pitat, petus, linḡis. Yo ba dik adé mage tobo yo.

Sapeé nak lem im̄o, asoak ne madeak, "Dak mi oak ige ite lem im̄o yo. Bé adé benatang buas. Maro ba ite mene poñok nak yo baé," padeak ne Udém o si mene poñok nak lem im̄o. Bi an si tinḡa nak lem im̄o. Bi ke'ing kulo dawen pue, mako atep poñok ne minoa. Padeak asoak ne, "Cubo ite makeé dawen lalang kulo. Dawen lalang o biaso ne padék. Sebab wakteu ite gik kayo belo o, anak bueak bapak awit mene atep ke'ung sapei ite mage dawen lalang," padeak ne aweé o. Jizei si lasung mene poñok ne ano mage atep dawen lalang.

~2~

Adé rajo kunai Tebo Lei aleu mebureu mai lem i[̄]mo o. Wakteu rajo o mebureu keneléak ne adé po[̄]nok nak lem i[̄]mo. Si temengoa adé sa'eé tun gidong ngobrol. Wakteu si ngobrol, Rajo o mi[̄]mang. Tenengoa ne jane dik cerito romongan o.

Padeak dik tuei mage keduei asoak ne ano, "Jane kelak nu, Cok?"

"Lebéak baik ngensanak madeak kelak dete."

Padeak ngensanak dik tuei o, "Uku lak jjei babu rajo. Jane baé jjei, tukang kesak ijei, tukang mesak kulo ijei!" padeak ne. "Asal uku e[̄]muk dik baik, e[̄]muk monok, e[̄]muk jane baé adé."

Udém o padeak dik nomor duei o. Padeak ne, "Uku temurut kelak ngensanak kulo.

"Amen ngensanak mepuk pin̄gan, misal ne, uku semupeu umeak. Amen ngensanak semupeu umeak, uku mepuk pin̄gan. Pokok ne jane lukak ngensanak, uku temulung. Uku temurut jane kelak ngensanak," padeak dik nomor duei yo.

Udém o ngensanak ne dik tui ano betanyé mage asoak ne dik paling titik, "Jane kelak nu, Cok?"

Asoak ne o jemawap, "Uku lak jijej ngunyan rajo."

"Kurang ajar ko yo! Awak kidék, ipo titik, lak jijej ngunyan rajo!" padeak ngensanak ne. Coa si nam pakei asoak ne dik paling titik o adé ba paling alep, ngen dik paling pitar.

Wakteu rajo gidong mim̄ang ano, si temengoa kécék-kécék romongan o, lajeu si coa lak mebureu igei. Si semelidik jane tobo o tun nien, jane tobo o semat.

Udém o si mepék taño nak keliling poñok o mako si coa seset wakteu aleu ngulang ne igei. Udém o rajo bélék mai penan ne igei.

Udém o rajo timoa igei. Si berpak tentera ne. Tun teleu basoak ano senergap ne. Udém si semergap ne, rajo em̄in tun teleu o mai sadeé ne. Wakteu em̄in tun teleu basoak o, si em̄in ne mage baik-baik, temanyé mage baik-baik mage tun teleu o. Wakteu si sapeé nak umeak rajo, dik teleu basoak o senam̄ut tun sadeé mage baik-baik, samo aweé rajo kulo. Kete tun sadeé betanyé, "Rajo, lak nikeak mage dik ipo?"

Udém o rajo madeak, "Uku lak nikeak mage saleak su'ang dik beteleu o, mage adat istiadat ite, makeé pengeleé, temurut adat tun Ejang. Makeé kejei aweé tun um̄ung biaso ne."

Wakteu rajo lak nikeak, tun teleu basoak ano madeak. Padeak ngensanak dik paling tuei, "Oy, rupo ne, asoak ite nien dik jije i nikeak mage rajo yo."

"Ite temurut baé," padeak asoak ne dik nomor duei ano. "Jane dik kelak ite belo o? Ngensanak lak jije i tukang mepuk pinḡan, kan?"

Rajo o ano bik temengoa wakteu si nak poñok o. Jane igei, si lak mage dik paling titik, si alep nien. Dik duei ano nel oak ne ba jije i tukang kesak. Gén kem̄uk neleé ne, daging monok neleé ne, jane baé dik kelak ne, neleé ne.



“Oy, rupanya adik kita betul yang jadi nikah dengan raja

Keduei ngensanak ne o ano iri ateé kemeléak asoak ne. Wakteu rajo gidong aleu mai negrei leyen, asoak ne ano melahér. Anak ne dik lahé o adé ba sebong. Ngensanak ne beduei o taméak genyik kemeléak anak asoak ne yo. Si dik jije mengasoak anak. Si mebukus anak asoak ne. Udém o si mepék nak lem petei, si monot ne nak bioa Ketaun.

Bi oak si monot mai lot, tenemeu mage tun tuei gidong aleu mai bioa. "Jane si o? Adé petei tesakut nak bioa beputar nak di. Mungkin o barang alat tun monot? Mungkin adé alat umeak tun monot?"

Udém o si mak, nemin ne petei o sapeé nak umeak penan diem ne. Wakteu si mukak, keneléak ne adé kepik nak lem o gidong tawei, sebong. Udém o kepik o neleé ne gén.

Gén ne Ujang. Kerno tun tuei o coa adé anak, sayang nien si mage Ujang o. Bik lei kulo anak o, si maje ne. Naje ne samo aweé caro tun leyen maje anak ne déwék.

Ijei bélék cerito ite mage keduei ngensanak dik mam̄ung kepik sebong o belo o. Tobo o gemiteé ne mage anak kuyuk. Anak ne sebenea ne nonot. Ijei wakteu rajo bélék, keduei ngensanak ne ano, madeak mage rajo. "Oy, Rajo! Asoak kémé bik melahér, anak ne kuyuk!"

Rajo tecengang. "Maso!" padeak ne. "Maso beé menusyo melahér ne kuyuk! O coa nam ite madeak ne!"

Padeak keduei ngensanak ne o, "Kémé coa perna temingā asoak. Tak ba bek ne, kete ne yo adé ba kelak Tuhan. Asoak ite o melahér, anak ne kuyuk."

Rajo o genyik nien. Ateé ne panes, cuman coa si nam madeak ne, kerno sako ne, kuyuk o betoa-betoe anak ne. Kerno o ba si meliaro baik-baik kuyuk o.

Deu rakyat cemacet ne. "Rajo o anak ne kuyuk," padeak ne. Tapi rajo o coa pedulei.

Udém o bi an-an, waktau ngunyan ne o teneé lei, aweé biaso rajo aleu igei. Gidong aleu, rajo coa adé nak umeak watkeu ngunyan ne melahér. Anak ne o sebong igei. Udém si lahéer kepik o, ngensanak ne beduei o mene aweé belo o igei. Nepék ne kepik o nak lem petei, nebukus ne baik-baik, ngensanak dik tuei dik monot ne.

Coa an udém o, rajo bélék. Tobo o beduei madeak bahwa asoak ne bik melahér igei. Padeak ne, anak ne kucing. Rajo tamēak genyik baé. "Mustahil!" padeak ne. "Bi duei kilei melahér, pertamo kuyuk, keduei kucing."

Ijei si coa as kemeléak ngunyan ne. Ngunyan ne madeak, "O coa nam ite madeak ne. Yo ba bagei ite."

Rajo temengoa kécék ngunyan ne aweé o, baru ba si sadar. Padeak ne, "Amen bagei ite aweé o, ite coa nam madeak." Ijei nepeliaro ne ba anak kucing o.

Bélék cerito ite mage anak dik nonot ano. Wakteu tun tuei o gidong lak maṁung pegas mai bioa, keneléak ne adé petei igei. Ptei o lasung si mak ne, udém o si eṁin, si mukak. Keneléak ne adé kepik, papa ne samo mage kepik dik dapet ne pertamo. O ba si meleé gén mage kepik dik nomor duei yo, gén ne Buyung. Keduei tun tuei o coa adé anak, jije riang nien, tobo o bik adé anak ne duei.

Tun tuei o maje keduei anak o. An-an bi lei kulo, bik pacak kulo bepanea, bik pacak kulo miling. Ati watkeu ne pacak miling, si bik pacak miling. Ati wakteu ne pacak bepanea si bik pacak bepanea.

Bélék ite mage cerito dik teleu basoak beé ano. Ngunyan rajo o galak ibo. Terus bepikir, “Jane padeak tun? Anak ku aweé kucing.” O ba iñok ne o sayang nien mage kucing. Negong ne, senium ne. Menangis si kemeléak kucing mage kuyuk o.

Udém o peristiwu ne ngulang igei. Rajo ano aleu igei, ngunyan ne gidong teneé lei. Udém o wakteu rajo laleu, melahér ba igei ngunyan rajo. Anak ne o beé.

Ngensanak ne dik beduei ano janj̄ing mage asoak ne yo kerno si jijeī ngunyan rajo. Pas anak keteleu ne o lahér, kepik beé, tobo o mene aweé belo o, nam̄ung ne igei kepik beé o, nonot ne igei. Wakteu rajo bélék, kepik o bik geniteé mage anak kam̄ing.

Kerno iri ateé ne mage asoak ne, o ba ngensanak ne mene aweé o ano. Maksud ne gemiteé o kerno si lak kulo mage rajo. Kaleu ngunyan rajo o sena'ak ne, karung yo si dik jijeī ngunyan rajo. Padeak ngensanak ne beduei o, "Searus ne ite dik jijeī ngunyan rajo, bahagia ite, iso asoak ite. Bagei ite ijei tukang kesak, uyo asoak ite dik idup senang," padeak ne.

Udém tobo o gemiteé kepik mage anak kam̄ing ano, bélék ba rajo. Ijei rajo o madeak, "Cigei si bejako igei!"

Rakyat deu nak sadeé o terus madeak rajo. Adé anak lahé^r kuyuk, lahé^r ne kucing, dan kulo lahé^r ne ka^{m̄}ing,” padeak ne. Coa si dik dekemai mage anak tun. Kerno o ba rajo bepikir, "Bek ne ngunyan ku keselé o? Jane ngunyan ku iso si tun? Jane si o benatang?"

Udém o sapeé tentera rajo. "Si aweé yo, Rajo," padeak ne. "Ngunyan nu o iso si tun. Ite mékét ne baé." Né^két ne ba ngunyan ne ano, terus si genatung nak pin^{ḡ}ir dalen. Kékéa mage tangen ne né^két. Api baé dik melitas semisit beé o. Tingā ba serwa mage bajeu ne nak awak. Daging ne senisit, nepék tun mecem-mecem dik pelegéak, lé^méa, cuko. O ba tiep bilei si terus mengamuk.



Sudah jauh anak itu hanyut ke hilir, ditemukan oleh orang tua yang sedang pergi ke sungai.

Bélék ite mage kepik beé dik nonot nak bioa Ketaun ano. Ahir ne si tenemeu tun tuei o igei. Wakteu tenemeu, tun tuei o madeak, "Waay! O, adé petei igei. Asei ku cigei si leyen igei, isei ne pasti tun," padeak ne. "Asei ne adé ba penan kepik tun dik coa senang mage anak ne igei. Jane si anak apang, atau jane ba, au?" padeak ne.

Udém si mak kepik beé o. Kerno si coa adé anak, nepék ne gén anak kepik ne aweé o. Tenegén ne Upik. Ijei ati wakteu ne pacak tawei si bik pacak tawei, ati wakteu ne pacak bepanea si bik pacak bepanea, samo mage dik beduei belo o. Ba'es nien titik beteleu basoak o, papa ne dekemai baé, cuman dikup beé.

Nik bong ne adé ba tun gerot, deu ilmeu, saktei deu pakeé. Naje ne Ujang ngen Buyung o. Naje ne besilé \bar{k} , an \bar{g} ar, meni \bar{m} ak. Ati si naje secaro nien ne meni \bar{m} ak, si bi pacak meni \bar{m} ak. Udém o nik bong ne maje si besilé \bar{k} . Ati si wak \bar{t} eu ne dapet, si bi pacak besilé \bar{k} . Udém o belaje memana, samo baé. Nik bong ne mepék ja \bar{m} eu nak das boloak, si midik ja \bar{m} eu o, keno. Ahir ne si lebéak pacak beduei basoak o. Udém o nik bong ne meluk ja \bar{m} eu mai das, lasung si midik, keno igei. Alang kepidik ne anak sebong beduei. Tei ne lihai pakeé ilmeu.

Upik adé nak daseé, pakeé ne adé kulo. Si o lebéak alep nien. Si pacak menék kudo.

Adé uleak nik bong ne o, bilei-bilei si mebureu. O ba si maje Ujang ngen Buyung o mebureu, mage caro meni \bar{m} ak. Adé wakteu ne debilei nik bong ne o aleu mebureu, anak beduei mileu kulo. Keneléak ne adé uso. Lasung si temi \bar{m} ak uso, keno, mateé kulo. Uso ano ne \bar{m} in ne bé \bar{l} ék. Nak di senang nien tun lemo o, ninik ne beduei mage tun teleu basoak ano, e \bar{m} uk daging uso.

Jane uleak nik beé ne nak di o? Tenanem ne mecem-mecem bungei, nebaris ne nak keliling umeak ne. Si temanem kulo mecem-mecem gé \bar{n} lapen. Nelu'us ne baik-baik. Amen tun sapeé, bungei o ketén, alep nien. Tenanem ne kulo mecem-mecem boak-boak.

Bi an-an nik bong ne o bi tuei kulo. Udém o nik bong ne meningā. Tingā ba nik beé ne mage tun teleu basoak o. Upik betanyé, "Jane adé pesen wakteu nik bong lak meningā?" Nik beé coa jemawap.

Udém o Ujang ngen Buyung terus mebureu uso ngen kijang. Amen si mebureu uso, coa si mot uso ano gidong tiduh. Gidong tegak si temim̄ak. Buyung madeak, si lak kemeléak kelihaiyan beduei basoak yo. Asoak ne madeak, "Ngensanak, dik ipo lak tenim̄ak nu? Jane lak temim̄ak uso, jane lak kijang?" padeak ne.

Padeak Ujang, "Uku dik paling lei, uku lak temim̄ak uso."

Padeak Buyung, "Amen ko lak temim̄ak uso, diem ba nak yo. Uku malau uso kileak kunai im̄o dik doloi o." Udém o uso liwet melilei kedelas jane ne. Ujang lasung temim̄ak, keno, mateé ba uso o.

Udém o si lak kemeléak kelihaiian asoak ne. Padeak Ujang, "Ko titik, ko temim̄ak kijang baé. Uku malau kijang ne." Udém si malau kijang ano, melitas ba kijang o melilei lebéak delas ne. Buyung lasung temim̄ak, keno kulo, mateé. Saking kedeu ne, daging coa si tekem̄uk igei.

Ijei, uleak Upik nak daseé adé ba kerjo mage ninik ne. Jane uleak ninik ne ano? Kerjo ne menét bajeu makeé benang, mene sauk. Si maje kulo caro tun temakep kan.

Udém o wakteu Ujang ngen Buyung bélék mai daseé, adé pesen nik bong ne wakteu si lak meninḡa. Si teminḡa pesen ano mage nik beé ne. Padeak nik beé mage Ujang ngen Buyung, "Tulung udi jemago asoak udi yo baik-baik! O ba pesen ninik udi belo o." Padeak ne kulo, "Dak mi sapeé asoak udi o celako atau letas sebaap asoak udi o gik titik. Walaupun si titik, si lihai."

Pesen nik bong ne belo o, adé kulo mage nik beé. "Amen Ujang mage Buyung lak mebureu, dak mi galak aleu mai īmo dik lue kunai īmo ite yo. Sebap amen si aleu mai īmo leyen, bé adé celako atau dapet balak."

Udém o, wakteu Buyung mage Ujang aleu mebureu mai īmo leyen, ninik ne coa si neleé nam.

~6~

Wakteu si aleu mebureu nak īmo leyen, betemeu ba tun gidong mesoa bes. Jijeitun o tekanyet. Padeak ne mage tun titik beduei o, "Jane nesoa udi mai lem beak īmo yo?"

"Kémé yo aleu mesoa uso ngen kijing."

"Oy", padeak ne, "kijing ngen uso nak yo deu nien. Sebap nak korok yo awit kulo tun mebureu. Pues tun temim̄ak ne, coa lak keno," padeak ne.

Padeak Buyung, "Alang kecalak uso nak yo!"

"Mémang calak nien," padeak tun mesoa bes o. Ati an udém si madeak cik o, melitas ba uso. Tukang mesoa bes o temun̄juk. Padeak ne, "O na, uso melitas! Tim̄ak ba!" Wakteu tukang bes o madeak, uso o temengoa, si tebedan.

Padeak Ujang, "Amen meloak uku temim̄ak uso o, aleu ko malau ne kileak! Keloak si melilei!" Ijei aleu ba tukang bes o malau ne. Udém o uso liwet melilei lebéak delas ne. Lasung si temim̄ak, keno, mateé ba uso ano. Ujang meleé uso dik dapet ne mage tukang bes o. Ijei tukang mesoa bes ano cigei mesoa bes igei. Saking riang ne si dapet uso ano, tukang mesoa bes o lasung bélék. Si em̄in uso mai sadeé ne, penan Ujang ngen Buyung o lahér belo o. Si emin uso o udém o majak tun sadee caro ite tun Ejang, jenamu ne tun deu, jenamu ne kulo rajo.

Pas rajo kemeléak uso o, si tekanyet. "Jane yo?" padeak ne? "Kunai ipo ko dapet uso yo?" padeak rajo.

Padeak tukang mesoa bes o, "Iso si uso o ku dapet idup."

"Ijei nemak nu baé?" padeak rajo! "Tei ne, ko meleé tun em̄uk bekeé uso?" O ba rajo mulai mareak mage tukang mesoa bes o.

"Iso si uku dik monoak ne," jawab tukang mesoa bes o. "Adé tun beduei dapet mebureu uso. Tun ne titik-titik, si lebéak alep nien. Papa ne dekemai baé mage papa rajo," padeak ne.

Udém o padeak rajo o, "Amen cik yo, tengén tun titik-ttik o galak mebureu?"

"Asei ku uyo tiep bilei si mebureu miñi, si galak dapet."

Udém o bepenyep ba rajo ngen tentera ne lak aleu mebureu. Tentera ne mileu kulo. Romongan o aweé tun lak aleu mañun berperang, jane lak aleu mañun mesoa uso nien. Tukang bes o mileu kulo. Si tukang temunjuk penan ne.

Romongan o aleu mai lem imo. Udém o si betemeu mage tun titik beduei o. mage anak rajo, tapi rajo coa teu.

"Jane uleak udi nak yo?" padeak rajo.

"Kémé mesoa uso," padeak Ujang.

"Kémé lak mesoa uso kulo nak yo, lak mileu mage udi," padeak rajo.

"Amen lak mebureu uso," padeak tukang mesoa bes o, "nak yo deu."

Padeak Ujang, "Maro ba ite temimak amen cik o." Coa an udém o tekéléak ba rajo uso. Rajo ano kemeléak uso o gidung tiduh. Padeak ne, "Oy na adé uso! Timak ba!"

Tapi Buyung madeak, "Amen meloak kémé temim̄ak uso, dak mi uso dik gidong tiduh, tim̄ak ba mage rajo." Rajo o lasung temim̄ak uso ano, coa keno.

Udém o padeak Buyung ano, "Waaay, amen awée yo, dak mi ba udi mileu temotoa kémé mebureu. Keléak caro kémé amen lak temim̄ak uso," padeak ne.

Coa an udém o melitas ba uso bepanea pelan-pelan. Padeak rajo, "Oy na adé uso! Tim̄ak ba!"

"Amen udi lak meloak uku temim̄ak uso o," padeak Buyung, "aleu ba kalau kileak, keloak ba si melilei." Aleu ba rajo malau ne, udém o uso ano melilei lebéak delas ne. Lasung ba Buyung temim̄ak ne, keno. Mateé ba uso o. Rajo sapeé tecengang. Udém o, melitas ba kulo kacéa lebéak delas ne. Lasung Ujang temim̄ak kunai belakang, keno kulo, mateé ba kacéa o. Ahir ne rajo sapeé sélég.

Kerno rajo ano sélég, anak bueak ne sapeé mareak kulo. Si betanyé, "Udi tun ipo?"

"Kémé tun nak yo ba. Kémé cuman diem lem im̄o. Yo ba uleak kémé tiep bilei,"
padeak Ujang.

Padeak tentera rajo o, "Udi yo som̄ong nien nak lem beak im̄o. Kémé baé diem nak
sadeé, coa si kesom̄ong udi."

"Kémé coa si som̄ong. Yo ba caro kémé," padeak Ujang.

Tentera rajo o madeak kulo, "Amen udi lak , betan̄ing nien uyo mage kémé!"

"Udi lak betan̄ing jane baé?" padeak Ujang. "Amen udi lak majak kémé betan̄ing,
maro ba ite betan̄ing temim̄ak boak léméa dik nepék nak ujung boloak," padeak Ujang.

"Maro!" padeak rajo. Rajo coa teu bahwa dik betan̄ing o anak ne déwék.

Udém o, Ujang meloak pihak rajo temim̄ak dete. Rajo temim̄ak, coa keno.

Udém tenim̄ak rajo, anak bueak ne neloak ne temim̄ak kulo. "Tulung tim̄ak mage udi," padeak Ujang. Kiro-kiro bik teleu poloak lai pemeleu tenim̄ak, coa adé gak delai dik keno.

Udém o rajo madeak, "Uyo giliran udi. Tim̄ak ba mage udi!" padeak ne. Ujang o tenim̄ak ne, keno. Pecoak ba léméa o.


Padeak Ujang, "Udi yo som̄ong. Lak majak kémé betan̄ing, temim̄ak léméa o baé udi coa keno. Amen udi lak kemeléak kelihayan kémé, aweé yo ba!" padeak Ujang. Si mak boak léméa o, si mating mai das, Buyung temim̄ak, keno, pecoak kulo léméa o. Tobo o beduei basoak bik naje nik bong ne waktau si gik titik. Ahir ne tenawei ne baé tun dik majak si betan̄ing o.

Udém o rajo panes ateé ne. Si bélék mai sadeé ne. Tapi seati si bélék, tenanye ne tun titik beduei o, "Nak ipo udi tingā?"

"Kémé tingā nak lem imo."

Padeak rajo, "Karung yo kémé lak berayak mai penan udi tingā."

"Buléak baé!" padeak Ujang ngen Buyung. Udém o kete ne aleu bélék. Ujang ngen Buyung bélék kulo mai penan ninik ne. Rajo o bélék mai sadeé ne.



Belum anak-anak itu diajarkan menembak sebenarnya, mereka sudah bisa

Wakteu Ujang ngen Buyung bélék mai penan ninik ne o, rupo ne ninik ne gidong sakit. Ninik ne madeak mage keduei anak o. "Uyo uku cigei an igei idup. Sebene ne udi yo iso si anak ku," padeak ne. "Udi beteleu basoak yo uku dapet sewakteu monot. Uku madeak dik sebene ne. Udi yo maséak adé iñok ngen bapak."

Tecengang ba anak beteleu basoak o. Si beñok mage ninik ne. Padeak ninik ne, "Udi dak mi igei beñok mage uku, padeak ne. Udi beninik baé." Tobo o menangis temengoa cerito ne. tobo o iso si anak beé tuei o. Si tingā mage ninik ne.

Ninik ne adé pesen. Padeak ninik, "Udi beduei sebong yo harus jemago asoak beé yo baik-baik, dak mi sapeé adé celako. Jane baé kelak asoak udi, dak mi coa nemak, dak mi coa neleé," padeak ne.

"Au," jawab Ujang aweé o.

"Baik ba, Nik," padeak Buyung. Ijei keteleu anak o sedih nien temengoa pesen ninik ne. Ninik ne meninga. Si jeni'et pa'ak mage ji'et nik bong ne. Udém ninik meninga, anak teleu basoak o nangis terus menerus.

~8~

Coa an udém o, Ujang ngen Buyung aleu mebureu. Pas wakteu si bélék Upik madeak, "Uku adé kelak mage ngensanak."

"Jane?" padeak Ujang ngen Buyung.

"Uku adé pesen kunai nik bong," padeak Upik. "Nik bong meloak mak bioa macur kunai bioa rakso, mak bungei dik pacak menyanyi ngen mesoa burung dik pacak miling. Penan ne nak Tebo Sam dik oak nak doloi o."

Ujang ngen Buyung madeak, "Jije ba, kaleu mémang nik bong madeak cik o." Si teu , jane kelak asoak ne, pesen nik bong ne, dak mi coa nemak. Lasung si mak kudo ne. Nepék ne kudo nak adep poñok ne. Udém o si madeak mage Upik, "Ko tingā ba nak poñok yo baik-baik. Dak mi laleu. Kemuk nu cukup. Sekean kémé aleu, ko harus kemeléak taño kémé. Amen kémé berasea dapet aweé dik kelak nik bong ngen asoak, muju ba. Amen coa dapet, ite coa nam madeak ne," padeak Ujang.

Seati tobo o aleu, si mene taño. Taño dik Ujang pingān nak das lémén. Nepék ne baik-baik. Padeak Ujang, "Amen pingān yo pecoak, taño ne uku bi mateé."

Udém o Buyung gematung pisea nak das palei. Padeak ne, "Amen pisea uku yo bé ngecacak daleak mai pingān ngensanak, o taño ne uku bi mateé kulo."

Udém o aleu ba si beduei basoak o. Si coa aleu mai delai arah, kerno dalen o becabang duei. Dik Ujang aleu kak arah kidea, dik Buyung aleu kak arah kanen.

Sewakteu Ujang aleu kak arah kidea, sapeé si nak delai sipang dalen. Nak di si betemeu mage tun tuei. Tun tuei o madeak, "Amen udi lak aleu mai mīni, jane dik keneléak nak dalen, dak mi ko monoak. Dak mi ko pedulei. terus baé bepanea," pesen tun tuei ano.

"Au, Kék, amen cik o," padeak Ujang.

Coa an udém o, nak dalen keneléak ne adé imea, adé siamang, adé uso melitas. Keneléak ne adé keluang kelei umeak mekik pa'ak ti'uk ne. Sapee si panik, kerno si temengoa padeak tun tuei nak sipang dalen belo o. "Jane dik keneléak dak mi temim̄ak, kaleu tenimak, ko adé bahayo." Jijei si terus ba bepanea.

Alang kedeu ne dik gemanḡeu si nak dalen, si lak temim̄ak benatang o. Wakteu si lak temim̄ak imea, tibo-tibo si bubeak jijej patung, mateé. Ujang jijej buteu.

Tinḡa ba Buyung su'ang. Si terus mesoa jane dik pesen ninik ne belo o, udém o si seset nak dalen, lasung si mutar bélék ara. Coa an udém o si betemeu igei mage dalen becabang duei o. Terus si temotoa dalen dik kidea. Coa an udém o, si betemeu mage tun tuei o belo o. Tun tuei o temaak ne, "Bek ne ko nak yo,?"

"Uku coa teu dalen. Uyo uku lak temotoa dalen ngensanak ku," padeak ne.

Tun tuei o mageak petueak, "Jane baé dik keneléak ko nak imbo, dak mi ko gemanḡeu". "Au, Kék," padeak ne. Si terus bekudo. Nak dalen mecem-mecem dik tenemeu ne. Udém o si kemeléak burung. Burung o mengekik. Sewa'o ne terus nya'ing. Buyung lak temim̄ak ne. Buyung jijej buteu, cik o kulo, mage kudo ne.

Bélék ite mage Upik dik tingā su'ang nak poñok ano. Si kemeléak taño dik nepék Ujang. Pingān ne pecoak. "Bik mateé ngensanak ku," padeak upik. Keneléak ne kulo taño dik Buyung, pisea bedaleak ngecacak mai pingān dik pecoak o. "Aay!" padeak ne, "Amen aweé yo, ngensanak ku mateé kete." Upik menyep kete alat-alat ne. Nemīn ne kulo juadeak. Si mak kudo ne. Seati si aleu, Upik ziarah mai ji'et nik bong ngen nik beé ne. Padeak Upik aweé yo, "Nik bong, beé, uku lak aleu mesoa ngensanak ku. Si bi mateé. Uku arus mesoa bekeé ne. Amen tobo o maséak idup, muju ba. Amen si bi mateé, ite cigei nam madeak ne."

Upik temengoa, adé sa'eé kunai lem ji'et ninik ne o. "Alae ba peu! Kémé meloak ko laleu." Lasung Upik laleu, si betemeu mage tun tuei nak sipang dalen penan Ujang ngen Buyung betanyé. Padeak tun tuei o, "Lak mai ipo ko sebene ne 'Dis?'"

Padeak Upik, "Uku lak aleu mesoa ngensanak ku."

"Totoa ba dalen yo, dalen penan ngensanak nu melitas belo o. Tapi adé sarat ne didik," padeak ne." Jane baé benatang dik gemangeu, dak mi ko monoak ne." Padeak ne.

"Jiji padeak Upik aweé o, seati Upik aleu, nepék ne kapes nak ti'uk ne, mako si coa adé dik tenengoa ne. Si terus bekudo. Nak dalen deu dik gemangeu ne, cuman si coa temengoa. Coa an udém o keneléak ne ngensanak ne dik beduei o bik jiji buteu. Si menangis kemeléak ngensanak ne beduei o.

Wakteu si menangis, sapeé ba burung. Burung o pacak miling.

"Ko lak aleu mai ipo, 'Dis?" padeak burung.

Upik tecengang. Jawab ne, "Uku aleu mai minai lak mesoa ngensanak ku yo."

Burung o madeak, "Uku bik teu kete cerito ne. Ngensanak udi beduei yo tun gerot. Si coa galak megina mulo jije ne sifet ne baik," padeak ne. "Mak sarat yo. Mak dawen sedingin mage bioa. Bioa yo cenapur mage bioa belas didik, kercik ke mai buteu o. O ba sarat ne," padeak burung o. Upik mak bioa dik nadeak burung o. Nerecik ne kékéa ngen tangen ngensanak ne dik jije buteu o. Ujang ngen Buyung ano idup igei. Kudo dik jije buteu o lasung bélék idup kulo.

Seati si lak aleu, burung sapeé igei. Padeak burung o ngen Upik, "Ade pesen ne?"

Padeak semulen o, "Adé. Kémé mesoa burung dik pacak miling, bungei dik pacak nyanyi, ngen macur kunai bioa rakso.

Padeak burung o, "Mak baé nak Tebo Sam o. Coa oak kunai yo."

Tun teleu basoak o bik bekuat kulo mage burung dik pacak miling, tobo o aleu mak dik leyen ne. Wakteu tobo o ēmin bélék petueak nik bong ne belo o. Bungei dik negong ne o menyanyi. Burung dik jizei kuat ne o terus miling, ngen bioa macur kunai bioa rakso o, cemimeé awak ne.

Romongan yo bélék mai pōnok ne. Bioa macur kunai bioa rakso ano, cenu'eé ne nak pa'ak ji'et nik bong ne ngen nik nik beé ne. Bungei dik pacak menyanyi o, tenanem ne nak datet dik keno angin-angin. Burung dik pacak miling ano nunyeu ne lepas. Jane dik nadeak tun si temurut ne. Si meraso senang kemeléak keadaan aweé o. Belo o wakteu si teleu basoak gi maséak titik, ninik ne deu temanem boak-boak, macem-macem jameu, man̄gus, nak keliling umeak ne. Kete pun-pun o bik bekeboak. Man̄gus ne uyo gidong mesak.



Kami mencari burung yang dapat berbicara, bunga yang bisa bernyanyi, dan air mancur dari air raksa.

~9~

Ujang ngen Buyung aleu bepanea. Nak lem bepanea tobo o sapeé ba nak sadeé penan rajo tingā. Si lak majak rajo mebureu. Rupo ne rajo o lak kulo kemuat ne bebureu. Si senang nien najak aleu mebureu.

Seati berakat romongan o kemeléak adé beé dik tepékét. Padeak Buyung, "Bek ne beé o terus senisit tun deu?" Si coa teu, o adeba iñok kañung tun beduei basoak yo. Beé o tecengang kemeléak tun beduei yo. Si coa meding gis pelgeak pas si kemeléak tun beduei o. Asei kemeléak anak kañung ne déwék. Mémang o anak ne nien, cuman si coa teu. Rajo coa pedulei mage beé dik tepékét o. Rajo o cuman temengoa padeak anak bueak ne baé. Ijei romongan o terus aleu. Beé dik tepékét o terus menangis kemeléak tun u'ei beduei o.

Tapi kulo rajo aweé coa semanget igei mebureu. Padeak Ujang "Amen cik yo, maro ba ite berayak baé mai penen kémé." Sapeé nak poñok, tenengoa ne mage rajo adé sa'eé tun gidong rami menyanyi. Dik menyanyi o adé ba bungei-bungei dik keno angin-angin. Keneléak bioa macur mai das. Mémang bioa macur o, bioa macur kunai bioa rakso. Burung bekicau miling. Nak di kulo keneléak mage rajo ka umeak ne o licin aweé bioa, kerno ilmeu saktei ninik ne belo o.

Udém si kemeléak aweé o, rajo madeak "Alang keba'es ne penan udi yo! Deu bungei, pengeléak ne ba'es, boak-boak deu." Rajo o tecengang. Burung o majak rajo masuk mai lem umeak.

Seati rajo masuk, si semesing serwa ne. "Bek ne semesing serwa, Rajo? Padeak Upik, o iso si bioa. Yo ba penan kémé."

Rajo o tecengang kemeléak aweé o. Si temot samo bepikir: "Penan yo ba dik baik ne nebut jijej negrei ite. Amen ite temuan ne penan yo, coa si sebañing alep ne. Tekenal nien penan ite bé."

Anak bueak rajo coa lak masuk umeak. Si terus mem̄uk boak. Coa an udém o, rajo lak bélék. Si madeak mage tun teleu basoak yo, "Uku permisi lak bélék kileak." Ijei kete ne bélék, cik o kulo rajo mage tentera ne.

Coa an udém o rajo tim̄oa igei. Lak mañun semerang tobo o. Si lak kemewaso penan tun teleu basoak o. Sapeé si nak di, anak bueak rajo coa semanget lak berperang igei, wakteu si kemeléak alang kedeu ne boak-boak o. Tentera ne terus mem̄uk boak-boak. Cuman burung o si bik teu niet rajo o. "Rajo o lak semerang ite," padeak ne. "Siap-siap ba udi!"

Rajo o lak masuk umeak lak temim̄ak tun teleu basoak o. Tapi si kemeléak anak bueak ne terus mem̄uk boak manḡus o, rajo senéak kulo. Hinḡo coa si tinget igei niet ne lak berperang. Rajo bekenék pun boak o ngen mem̄uk boak o kulo.

Bik kenyang rajo tu'un gacang-gacang. Anak bueak ne bi lak berperang igei. Udém o burung o madeak, "Uku teu niet udi aleu mai miñai. Udi coa lak baik, udi lak kidék. Lak semerang tun teleu basoak yo. Serang ba! Tim̄ak ba kémé!" padeak burung o.

Kemeléak aweé o, até rajo panes. Tibo-tibo tobo o menim̄ak, anak teleu basoak o gidong bebaris nak di, burung ano inḡep nak das atep. Rajo terus temim̄ak, tapi tobo o coa gak dikup dik keno. Tun teleu basoak yo deu ilmeu ne.

Tenawei ne baé. "Amen raju lak kemewaso penan ite yo coa gen sanḡup," padeak tun titik teleu basoak yo. Raju sapeé sélég. Si menyereak, belék. Coa adé penan mepék papa ne igei.

~10~

Wakteu raju bik bélék, burung o madeak mage tun teleu basoak yo. "Belo o adé pesen nik bong wakteu udi gik titik," padeak burung. "Amen lak teu iñok ngen bapak udi dik sebene ne, yo adé bahayo ne. Udi arus aleu mai sadeé leyen, tapi nak di adé tun kidék lak monoak udi. O ba pesen nik bong udi belo o," padeak burung o. "Amen udi lak aleu mai miñi, udi arus kemetén kegerot udi kileak," nadeak burung o. "Ijei nik bong mageak udi sarat dik paling be'et. Nik bong meloak udi mesoa bungei dik pacak menyanyi, mesoa bioa macur kunai bioa rakso."

"Uku adé ba burung dik pacak miling. Uku kulo neloak nik bong temulung udi. Udi arus kuet ngen binei kemetén kegerot udi. Udi arus dapet kete ne. O ba dik nadeak nik bong mage uku belo o," padeak burung mage tun teleu basoak yo.

Udém o adé igei pesen nik bong belo o: "Amen udi kemerjo kete pesen ku yo mage caro tulung-menulung, mako Nik bong meloak uku kemetén bukeu yo mage udi. Isei bukeu yo adé ba cerito asal-usul tobo o, cerito in̄ok ngen bapak ne."

"Yo," padeak burung mage tun teleu basoak o. "Baco ba bukeu yo, mako udi teu api udi dik sebene ne." Nak lem bukeu o adé pedoman mai sadeé rajo. Nak lem bukeu, rajo o bapak ne.

Ujang Buyung ngen Upik aleu mai sadeé rajo. Wakteu si aleu mai mīni, tobo yo melitas nak dalen penan tun beé dik nékét. Keneléak ne tun beé o, tinget si. Asei ne adé nak lem bukeu nik bong ano. Udém o si betanyé mage tun dik adé nak di.

Padeak Ujang, "Api si gén tun beé dik nékét o?" Tun jemawap, tun beé o adé ba ngunyan rajo. Tei ne, dik genatung nak di o adé ba īnok kānung tun beteleu basoak o.

Udém o, Ujang meloak Upik jemago īnok ne. Ujang ngen Buyung aleu mai umeak rajo. Si menog, "Bak!"

Wakteu si menog 'bak,' rajo tecengang. "Bek ne udi menog uku Bak?"

Padeak Ujang, "Si aweé o, Rajo. Yo bukeu dik teningā nik bong kémé belo o. Wakteu kémé lahér, gik titik belo o, nik bong masoak kémé. Nik bong temeu kémé beteleu basoak yo nak bioa."

Rajo mukak bukeu o. Si tinget. "Yo anak uku!" padeak ne. Bekécék-kécék nak lem ateé ne, yo adé ba uleak ngensanak ngunyan ne.

Rajo megep anak ne beduei o. Anak beé ne ngen ngunyan maséak nak dalen.

Upik jemago īnok ne baik-baik. Īnok ne cigei si meding letas ne igei. Letas ne bi ka'en, pas si kemeléak anak ne nien. Si menangis. Wakteu si menangis, rajo mai temetok tilei pékét o. Padeak ne, "Mak coa saleak, yo adé ba anak ite nien."

Ujang, Buyung ngen Upik, si temu'un īnok ne kunai penan si genatung o.

"Kete ne yo iso si kerjo uku," padeak īnok ne.



Raja memeluk anaknya berdua ini. Anak perempuan dan isterinya masih di jalan.

"Memang iso," padeak rajo. "O adé ba uleak ngensanak iñok ne beduei o." O ba lemo beranak o megep samo menangis.

Menangis kulo ngensanak ngunyan rajo dik beduei nano, sejijei-jijei ne, sapeé pa'ea. Tentera rajo o madeak, "O adé ba uleak ngensanak ngunyan rajo. Kémé monoak ne baé." Seati tun beteleu basoak o madeak "Dak mi monoak!" bik putus ba kagen tun beé beduei o. Mateé ba ngensanak ngunyan rajo yo. Yo ba balasan uleak kidék tobo yo belo o, tentera rajo déwék monoak ne.

Ijei batas yo ba cerito tun teleu basoak yo.

Temanem pai bekeboak ne pai,

Temanem lalang bekeboak ne ape.

